



尤菴集 五十二

墓表

共六十

^16
2410
53



2410
60-53



九菴先生文集卷一百四十



墓表

學生朴公墓表

密陽之朴祖於新羅王赫居世世有冠冕本朝有
 諱賡尚 恭靖大王惠長公主其子諱徐昌為監司
 是生僉正諱維於公為高祖也曾祖諱仁齡祖諱餘
 慶考諱彰皆不仕妣平山申氏其父奉事偉亨也公
 諱彥生字士美軒豁奇偉通曉事物真率無華友愛
 篤實當光海朝再從弟鼎吉權位隆赫欲縻以官以
 為己黨公不肯終老于家歿于 崇禎己丑得年七
 十三娶開城金氏正郎大鎰女剛毅通達性如男子

最好施與見人波吒衣服雖無故新而無惜也每遇父母忌日必望哭失聲後公二年生沒後公八年同葬于沃川赤登江上代谷里子坐午向之原子篁簪跋女壻陸光遠宋時逸朴惟謹鄭溟也篁生男守欽生員女適宋時端簪出爲公弟好生後生男尚欽時欽景欽女適申翼漢柳東惠跋生男明欽生員次文欽思欽啓欽女適琴志和內外曾玄百餘人余先君子睡翁公自京寓居鄉里三十年與公爲莫逆友未有故未嘗一日不相對也以故余不肖等視公如家叔焉今二家父墓木皆拱而吾與篁等老大將死遂掩涕而書公之墓石如此云

塾翁柳君墓表

文義朽谷里有柳君諱興龍字致雲者自少種學績文不事公車業教授生徒使知孝友忠信遠近來學者甚衆其爲教必先小學書曰君子修己事親之方盡在此書矣清晨整坐訓誨雖寒暑不倦鄉風蔚然一變諸生皆謹慎雅飭不問可知其某弟子也李叅判晚榮京華子弟也亦學於君嘗爲邑宰過君而請教君舉雋不疑告暴公子語以警之李公深服其爲對病之劑君之因才而篤焉者蓋多類此也以故無遠近貴賤皆以長者稱之君篤孝人也甫過成童值壬辰兵亂隨其父伏林中父爲賊刃所傷君涕泣抱

持乞以身代賊感而捨遂以君驅去賊將見君啼號不食問知其父故也義而釋之君自竹山晝伏夜行莫適所之時念父而呼天焉有一老人指示前路曰勿過慮父子可生逢也君欲更問其何知則忽不見遂從其所指到清安地有士人朴霽未嘗識感其至誠爲之津遣于其家父子竟得相見居數日而父没君號擗如不欲生雖在亂離中送終之禮誠慎勿悔宗族咸服焉考有正配金氏無后君母迎日鄭利老之女也君事兩母俱盡誠敬無所欠闕前後服喪不以衰老而少懈見者愍其漸毀而君執禮愈固卒亦免於滅性人以爲神勞君感朴霽恩歲備酒食以謝

之及喪又服之清安人義而稱之君常痛父非命平生不近倭物嘗有人饋以山肉知其爲降倭所捕而却之祭時少有未盡則痛自剋責使人撻己於廟門外家人懼不敢不盡其誠或助以祭需則必拜受常以人家忌祀輪行設紙牒爲非禮遂以三代祀事專付長子時俊以爲定式所居先廬歲久傾圮人或勸其改構則曰自吾居此室今已四世不忍毀也君雖不得一命而其忠愛之心未嘗不係於君國 仁廟播遷公州君慨然曰 君父何在此豈臣子在家之日遂與其子時儻及門人尹渙負糧赴 行在路聞賊适已誅 大駕旋軫或勸其追及路左君不肯曰

吾爲職分而赴亂豈可希覬而自銜乎丙子虜亂君將老母入深峽聞江都失守往見地主謀起義旅俄聞城下之辱遂入山痛哭君其聞魯連之義者歟君於古人節行必擊節而欽尚焉每過忠孝棹楔亦必下馬致肅焉鄉鄰亦有畏君而不敢爲非者或有以君言而改行者苟非誠信積於中而孚於人則烏能如此哉君晉州人鼻祖挺高麗監門衛上將軍入我朝世仍顯奕高祖仁貴禮曹叅議曾祖希齡戶曹叅議號夢菴祖大敦將仕郎考諱卽之程君以萬曆丁丑十二月廿五日生幼穎悟出羣父竒愛之曰吾祖夢菴之業庶不墜地君娶清州李氏判官汝清女

也壺範端淑媿德無違君沒於丙申九月十一日李氏後公十一年以丙午二月十一日年八十六而終與君同葬文義先墓下西向之原三男二女長卽時俊進士次卽時儻季卽時億金時誠宋興吉卽兩婿也曰時倣時似庶出也孫男弼辰達辰景辰朴炫李克楷金斡妻者時俊出進士相辰進士黃道興李瑞妻者時儻出泰辰吳國賓妻者時億出宋興吉一子光材武科僉使二女爲崔鉉任自重妻內外曾玄多不能盡錄君嘗自號塾翁及其沒經而出者數十百人傍郡儒士會葬者莫不涕咨曰士林之根柢喪矣余與同春皆與君有連姻義熟知其實行純備同春

嘗作挽以哀君有後學斯文語後以前後鄉薦白于朝贈君司憲府監察噫君之學之行自足以不朽矣况同春之所引重如此則又奚待於余言獨恨今之世不復見斯人遂略書其所感如此云

學生李公墓表

世宗大王有別子曰臨瀛大君璆歷四世而有希說屬疎爲司果司果娶進士趙宗亨女生公名時振字起夫以孝旌閭事載三綱行實其略曰父有宿疾某年纔十二一不離側及喪哀毀過禮雖亂離不脫衰麻母疾斷指和藥以進母絕而復甦居喪啜粥三年幾至滅性云蓋公孝行出於天得非爲勉強亦盡事

兄之禮坐食進退兄不命則不敢也公旣稟賦純篤又聞沙溪金先生學有淵源卽往事之受小學家禮心經近思等書亦喜文藝遭值昏朝輒廢舉杜門疏食菜羹人不見其戚容其薰染於師門之力不可誣也及至 仁祖聖際則公已病矣竟以 崇禎癸酉七月廿一日沒得年五十六蓋公其受氣清弱毀於執喪眼暗耳聾胸膈痞隔醫藥不效識者曰何以勸叔世之人子哉墓在忠州治北末屹山負癸之原初室黃氏生六女其婿吳益輝尹崙尹聖輔韓櫟魚見龍沈虞繼室沈氏生男晚栽晚錫晚賚女婿金鼎生也公沒時長男九歲沈氏育稚持家凡百得宜六親

稱之二室皆祔晚栽三男曰世彥進士世迪世沆世迪爲晚錫後女長適金益礪次幼嗚呼公世實文之穆以至性純行從事於學而潛德未著不爲世用惜哉然行服鄉閭身膺褒典愧伏頑愚矜式淫俗其視顯然隆赫而人不食其餘者何如也時 崇禎強圉單闕恩津宋時烈述

展力副尉金公墓表

公諱慎孝字行源光州人新羅末有王子興光知國將亡出遜于光子孫因家焉而連八代爲平章事故人號所居洞爲平章高祖 昌陵叅奉克耻曾祖進士愛胤祖府使益亨考忠義衛震復妣尚州朴氏

贈叅判致敬之女公以 萬曆己卯九月十九日生容貌清潤才調度越人期以遠到不幸年二十五而歿配郭氏余姨母也天資絕異識度高明慮事論人率多懸合嘗曰人不學問則心無所樂故入於聲伎放浪之場矣雖古賢人言無以易此矣故孀居四十年事舅奉祭無不合禮 崇禎乙酉年六十五而終焉籍善山其先出自玄風故或稱玄風人考忠臣奉事自防也無子以公三從弟主簿慎己子光老後焉今立此表者實光老也時 崇禎庚戌十月日姪恩津宋時烈述

進士崔君墓表

崔君光瀚與其配李氏既沒余得考其狀曰君早失怙恃育於仲氏能哀慕饋莫徒步十里省墓不怠既克自勤業取司馬試政官屢有所擬而終不成一命君曰命也亦自廢舉業惟以奉先教子爲意亦不屑於生產諸子賀辰進酒食則泣曰吾不能養父母而顧享汝等之養耶與兄弟甚相好見鄉人醜而貴者面舉其過嘗於舟中值暴雷震人顏色不變常於案上置近思錄一部焉李氏貞靜端潔不妄言笑家內置物必方列諸子書冊亦手自齊整曰豈可苟亂耶又嘗曰言動之間雖婦人亦不可不謹况讀古書士子耶君今 上辛丑年七十四閏月四日卒其後丁

未李氏七十五而卒墓在忠州末屹山先兆君字浩遠系出忠州上祖原儒高麗寶文提學其後士大夫不絕高祖司憲府監察士恭曾祖贈戶曹叅判汾祖觀察使蓋國考承仕郎鎔妣羅氏僉正恂女李氏

大王幾世孫考球縣監贈承旨君有男六人女一人男撻枋構枳檀柱女適金相夏撻男世赫世燁世炳女幼枋男世炯世炫世燦三女幼構男世燻女幼枳男世燮女幼檀男世燭次及二女皆幼柱二女皆幼君以洪族茂材竟沉淪以歿李氏淑行亦將墮晦豈不惜哉然六十一孫將益繁衍不食之報將在於斯耶檀也以其姨兄李之濂養而言來求銘略書

此俾刻于墓石構有至行有人所不及者檀也云

進士尹君墓表

有才質卓異不遇於時天又嗇壽三十七而歿者曰故進士尹君諱惟健字以天也君沒後五年時事更新君儕流無不騫騰羽儀則皆歎九原之不可作噫氣清者數局自古而然獨何君歟君生四歲知文字未幾淹貫經史低昂論議聲各出等夷年二十八中司馬月沙李相公爲考官嘗以君不得爲一頭愧於失才君每出入公車文辭羨溢掇其餘者亦得以居上游纔出場屋篇章已播在人口人朝夕期以聞大科掉鞅於羣英既而世道大變昏朝有廢 母議又

賣題狼藉君歎曰如此尚可以涉迹於其間乎遂自泮宮揖諸生歸結茆西郊左右圖書時有遺懷之作以自見與弟妹同居一室奉侍母夫人志物之養無有不至家雖屢空而歡然無不足之歎竟以戊午九月廿四日終于家配權氏高麗大師幸之後直長級之女端靜周詳不喜紛華尊章以下無不稱其誠敬孀居四十餘年麻絲井臼無所不親甚矣其貧也而猶嚴課諸子俾無失學菟博之具必投之水火故諸子皆力於文行長子長卿進士蔭仕奉事次飛卿文科今爲承旨國卿直卿皆進士人皆曰賢母之教也奉事無子以季房男明翼爲後承旨男明遇明運明

遠明遇進士入仕女適宋基學國卿男明義明道女
適梁益壽直卿男明保明徵女適朴尚信內外曾孫
若干君在泮鄭仁弘誣退溪栗谷牛溪君協同同志
上章論辨仍削附仁弘者儒籍又於道遇貴戚朴自
興斥拒其好言君可謂直氣勁節之士歟假之以年
則其所就必有異於今衆人也君坡平人高麗壁上
功臣莘達大師瓘皆上也牧使宿僉正應奎叅判
仁涵典籍弘立高曾祖考也妣趙氏司藝廷樞女內
外皆甲乙族也君儕輩皆名流而金慎齋集李芝峰
晬光趙南溪廷虎寂相親與墓在坡州龍池洞銘曰
苗而不秀將誰咎天道之定徵胤慶欲知君者茲其

可

僉樞成公墓表

公昌寧人嘗讀書慨然以古人爲必可師常以毋自
欺爲三字符見人之不善嚴辭峻責不少假借人始
而恠中而畏終則無不尊信敬服焉羣試有司輒發
解終不成進士蔭仕嘗主司贍寺簿旣而安於家食
益無當世意閉門不出者四十餘年年八十八以微
恙終於今 上六年之乙巳公之居家行誼可書者
多而其知而能言者皆不在世惟後輩見公衰暮猶
日必冠帶晨謁祠堂至老如一日 孝考喪年已八
十猶不肉以至卒哭子弟涕泣交諫公曰吾得年已

多今以此病而死何恨卒之日神益精明治命井井已則倏然而逝人於是益知公素養之不偶也曾祖諱希周宗簿寺正贈禮曹叅判祖諱世平江原道觀察使贈左贊成考諱澆工曹佐郎贈工曹叅判妣淑人贈貞夫人南陽洪氏公娶判官朴從龍女生二男二女男震丙登第嘗爲掌令震井業儒女進士金以謙黃德載孽子震慶震晟震命掌令男虎變女察訪宋基德震井男虎文虎爽噫公以醇樸質實之資誦讀經書不敢安於全然無事於魯氏書得一句好而敬服焉其泐然會於心而見於行者人有所不得而知也斯豈今人所及哉墓在州西臨巖午向之原嘗

以大耄超資除實職故題曰折衝將軍僉知中樞府事成公諱汝松字直卿之墓云爾時 崇禎壬子二月日

禮賓寺叅奉 贈吏曹叅判俞公墓表

市南公自水原以其考生年之周甲 崇禎己卯遷其墓葬于林川之七星山指南洞以妣南氏祔焉而自爲埋銘以誌之後三十四年壬子恩津宋時烈市南友也書于墓前之石曰俞氏出杞溪高祖諱汝霖禮曹判書曾祖諱絳戶曹判書祖諱涵進士 贈左贊成考諱大徹郡守 贈吏曹判書郡守娶水軍節度使李欽禮女生公公諱養曾字若所少事舉子業

久不成及光海政亂公作詩謝知舊之趨羶者因自
京邑挈家歸田力穡自給 仁祖反正要路多公所
親而仍歛迹不與往還甲子 上播遷公倡率鄉子
弟以迎 駕又收聚粟米以助軍食越三年丙寅吏
曹承 褒命除禮賓寺叅奉其冬十一月朔考終于
京第而南氏前卒于癸亥閏十月之卅日公外和中
剛辨於利義急人之窮無間親疎淹貫經史談論亶
亶聽者不覺其移晷然知公者鮮其知之者未嘗不
以爲忠信敦確人也南氏其考叅判以信外祖大司
憲丁胤福姿性端粹父母稱其孝既行方游叱嗟未
嘗違公志撫子女愛而教疾革撫市南背曰吾大命

有限不及汝成立市南歷事 仁孝二聖及今 上
蔚然爲儒臣士林甚推之官至吏曹叅判 贈公如
其官妣視其秩男長集進士叅縣監次卽市南各叅
渠監役季槩女適都事李惟清次適博士尹衡志次
適監役李維聃進士生炫煒燧命錫命欽縣監生命
徽烜市南生命胤文科正郎命弼進士壯元命興業
儒監役生命一叅奉李都事女爲崔瀾妻尹博士生
梅栢松長季皆縣監李監役生夏慶虔夔長文科府
使內外曾玄摠若干公以美資厚德沉晦沒世而其
子孫蕃衍且多賢君子謂之餘慶所及此可爲爲善
者勸云爾

漢城庶尹尹公墓表

漢城庶尹尹公諱煥字某坡平人始祖莘達高麗大
師高祖倬官左尹允爲師儒爲趙靜庵諸賢所重曾
祖先智兵馬節度使祖暉 贈承旨考昌世 贈吏
曹叅判叅判公有至行事在清陰文正公銘述母清
州慶氏副提學渾之女公以 萬曆庚辰十月二十
一日生十四丁外艱三十中司馬四十三蔭仕除利
仁道馬丞以治績 仁祖初特叙軍資監主簿移掌
隸院司評嶺南饑受 命專幹賑事竣還歷刑尹曹
佐郎翌年慶夫人卒服闋拜漢城判官丁卯虜變扈
駕江都難定出監長水縣秩滿遞歸用前能超陞庶

尹以卒癸酉二月三日也其十月二十二日葬于鎮
岑縣九峰山下以男從勳 贈左承旨夫人尹氏籍
南原僉樞祁之女年十八歸于公 崇禎癸卯年八
十以八月十八日卒十月九日合葬公墓長男雲舉
縣監娶叅判金光炫女生男曰揆側出幼鴻舉郡守
娶判書崔來吉女生男抗摠抗縣監三女適鄭正陽
洪受疇朴泰辰其二幼溟舉娶叅知李尚伋女生男
拭抑擇擇生員二女適李星齡梁克家餘幼海舉娶
縣監金厘女生搗哲提摛並幼者三凡生七男二女
鳳舉出爲季父後而牧使尹衡覺郡守李時中公在
時所女者監役申晟進士鄭有錫夫人所選者內外

孫曾多不能盡記而尹牧使甥館都事金壽良修撰
李有相判書金壽興仙源月沙清陰三大相孫也尹
夫人嘗以說人云蓋自大師公以來尹氏世爲名族
至公兄弟八松公煌弼善公炴最顯公旣樂有而由
己而致者又有焉當光海末人具貝玉而公獨著其
庸 仁祖初羣彥盈朝而公首膺賑 命其才謂此
少槩見亦足以張尹氏之軍矣若其慶母之榮聯棣
之樂子孫之多世謂先德之貽然不有栽者其何以
培公於是乎賢矣

雪峰縣監柳公墓表

柳生斗寅葬其父母於清洲青川縣之長善里而請

書其事於墓石曰吾父名艘字濟夫自幼以孝稱八
歲喪其考能哀慕素食長者憂其生疾而亦不忍諭
以變食十歲喪其祖考能持重如禮遭亂無家流徙
中手執斤斧先立祠堂以奉神主祭祀時其慙愴終
不衰又能自知學文從鄉先生李西溪得胤受書漢
陰李相德馨薦爲齋郎曰此克紹吾外翁家業者例
遷奉事直長陞引儀歷主簿監察司評司議又由主
簿爲玉果縣監公在諸司凡八年廉謹奉職至是西
溪寄以書曰豈弟慈詳爲玉良賀時當昏朝之末爲
吏者剝割歛怨吾父誠心撫摩邑人順賴年四十四
喪其母以毀致疾後以別提除雲峰縣監數月遞歸

自是無意仕進自號散翁書其說於壁間以自見
孝考己亥年八十子弟請引年祈恩不許越四年壬
寅寢病却醫藥六月廿四日終焉吾柳出文化上祖
大丞車達吾父之父曰昌緒展力副尉祖曰埴縣監
吾父之母府使洪仁祿之女而吾母成氏上護軍慎
其考也吾母有婦德事姑而姑以孝稱之御家衆而
家衆以慈稱之與吾父同年生而後五歲終焉一男
吾斗寅也長女適縣監金慎厚次適別提李時荃側
出男斗南女爲金鑛妻縣監四女壻察訪申自澄士
人洪處誼縣監申啓澄叅奉李九成別提三男璵璠
璿而女壻士人鄭翹也同宗軒哲之子禮卽爲吾後

者而禎與祥及祐斗南出也余遂記其言俾刻之石
曰吾嘗納拜而略識其爲長者矣乃言不誣矣銘曰
長善之里其山邃密惟久惟遠祀以不絕

內侍教官金公墓表

公學生府君諱宗儒之子諱翱字子翔墓在學生公
兆下其世系略備于先表公生長名家志操端潔取
舍不苟常罕出門戶淨掃一室琴書瀟灑每早起整
其衣冠對床吟唔家貧不問有無 萬曆丙午中生
員試 崇禎丙子大學舉而應薦卽授齋郎丁丑爲
監役皆不赴後又除內侍教官則曰爲貧而仕古道
也遂強起供仕朝廷有陞擢意己卯十二月病卒于

京邸享年五十七配崔氏正郎鐵剛之女有女士行
治家教子無不可法與守夢鄭公擘戚而隣居每戒
子弟曰必以守夢爲法後公三十年沒而祔焉二男
時閔時顏一女爲朴震煥妻時閔男曰相玉進士相
鉉爲時顏後朴晉出而仕於朝者正郎重輝司諫增
輝縣監昌輝也余嘗與同春宋公浚吉邂逅公於逆
旅傾盖若舊不忍相離蓋公神采清明議論精敏不
問可知其爲學生公家子弟也又從其隣並聞公嘗
入場屋知考官要致知舊意深自避匿考官歎服焉
其家僕嘗詭售病馬於人得善價公責其僕招其人
告以實而還其馬此雖細事其餘亦可知也公嘗自

言世無知我者惟李思彥一人而已蓋謂叅知李公
尚伋也進士以余有先誼也故來請文以識其墓云

同知李公墓表

延平府院君忠定李公諱貴娶 贈叅判張旻女生
三子公其仲也諱時聃字子玄出爲仲父 贈判書
諱資之後判書公配海州吳氏也光海君斃敗天常
罪宗社忠定公協贊弘猷翼戴 聖祖撥亂反正
而其三子實左右之父子兄弟皆策勳封獨公降從
原從然功勞實多故特 賜田宅奴婢以酬之公時
在張夫人心制翌年甲子始除主簿轉監察遂陞通
政始公聰悟出人六歲能作大字及五字句詩又善

畫後中司馬試爲儕輩所推及是內助囊篋外結英
俊所以輔益 新化者多矣乙丑拜南平縣監丁吳
夫人喪制除出爲淳昌郡守遞守金堤郡已忠定公
判書公相繼捐館沒喪連拜大丘潭陽府使綾州光
州忠州牧使間爲僉知者再 崇禎癸卯公年八十
以優老典加嘉善階授同知中樞府事公欲赴 闕
謝恩而病未能焉上疏乞免 上許之乙巳二月初
八日公考終于益山村舍之正寢追 贈兵曹判書
其四月葬于公州甲村已向之原公以名父子耳濡
目染無非忠孝大節性又溫恭未嘗言人過失不與
人相較人無少長待以誠信故雖居鄉里鄙屑之間

一無有怨疵者居官專以節省慈惠爲心而不務聲
名惜人肌膚無異己私故歷典八邑人無殞命者常
曰營立產業將以爲子孫計也然吾未見子孫能守
其先業者也故在官帑藏必盈溢而家不增一口一
畝焉嘗築草堂於村裏環以梅竹荷菊而名以四友
佳辰令節呼儔命賓彈琴吹笛窮日夜不倦寬樂嬉
怡人不見有皺眉色然亦常自修整每朝必與櫛衣
冠未嘗放肆自便至於屬纊之際神氣清明而不爽
焉夫人韓山李氏郡守德淳之女先沒而祔焉世傳
公上世實祖唐郎將李茂茂來討百濟留仕新羅受
籍于延安云 本朝石亨以文章最顯謚文康至忠

定蓋五世矣公四男愷牧使惇縣監悟叅奉秘主簿
女適幼學尹惟益曰愷懷情側出也牧使生明著公
著皆進士公著有俊才與李慶著皆短命洪受寬安
相萬壻也縣監生後著世著李之鎰金濬壻也叅奉
生鼻著敏著夏著鼻著郡守而叅奉申遇相鄭斗祥
韓配夏壻也主簿生徽著其四女壻郭始徵宋昇李
真卿尹明教也外孫尹宣卿任卿憲卿挺卿任卿生
員而二女適魚震奭朴世榮也記昔癸卯之歲公乘
船過余於江村以余爲文康公外裔也道語平昔甚
賜款厚余竊矚公有先輩長者風儀復與公諸子游
而好也今於墓文之作神思衰落不能記公十一然

觀其所已記則其所未記者仍可知也

義禁府都事

贈吏曹叅判李公墓表

怡愉堂在上黨山下公其堂中人也余早依公門下
受恩甚重時時竊矚公絕無世人矯飾表襮之行憂
喜欣戚一任其真真赤子心也又不忍之意並及微
物不使殞殒曰彼亦有一般生意矣公兄弟凡五官
余受教於三門甚熟蓋其淳厚慈仁之風真元季之
難爲也故李氏在槽紳間蔚然爲名門不以官薄而
人敢小之不但以稼牧麟餘微而已也公早孤力學
只取司馬晚際 昌辰始從末仕仍又困滯躓蹙僅
躋六品而沒終不得試一縣豈非命也耶其丁巨創

在倭變之日故平生痛毒尤不自克祭時慙愴感動
旁人此亦見公之一端也夫人天性至孝雖謂之女
中曾閔可也蓋女子之孝移天則亦從而移而夫人
則誠益不衰者艾則忘焉者滔滔而夫人則追慕益
甚言及必飲泣真所謂以爲適然而其後常然終身
未嘗不然者也推而至於理家接人亦無非仁心之
所施故夫人在而人無不稱慕歿而哭者哀而思者
久非其誠有於身其能如是乎夫人晚有一子早以
才行稱曰泰淵及決科爲侍從爲監司可謂己致而
人皆曰其父母之慶也嗚呼公真怡愉堂人而夫人
惜乎世無有劉宗正不得爲女史中人也公教監司

朝夕不忘冀見立揚而不遠焉此實臯魚之至痛然
推馳之榮克賁泉途夫人受真誥食其祿又今上
嘗特賜衣資食物夫人時已八十二矣自下跪受于
庭祝 聖良久聞者感涕曰幸哉有其子也非夫人
其又能有之耶噫天之報施孰謂其茫昧耶不佞幸
不以恃行得罪門闕故夫人恩遇甚至當監司之出
按湖西也余猥以冢宰入謁夫人夫人泣曰爾父母
與我公何歸而老身獨享光榮也當時實知其言之
悲也今則夫人又不可見而余與監司俱孤露老大
矣遂愴涕而書其表如此公與夫人可書者固多而
準格當有豐碑之鑄故並其世德子孫不錄焉怡愉

堂公仲氏大諫公諱德洙嘗別築以講孝義如楊延慶云時 崇禎紀元後三十九年丙午五月日外甥恩津宋時烈述並書

判官柳公墓表

柳公浚字澄遠自號四矯壯歲休官闢精舍教授于羅州之茅山其諭學者之言曰學問之道無他爲子而孝爲臣而忠夫婦而別長幼朋友而序與信是也又曰嚴師在前經籍是也勅敵在內物慾是也其言有物而又規繩甚備故從遊者甚盛 崇禎辛丑年七十八而卒于九月初六日門徒持服送葬既又立祠于社而俎豆之後十二年孫尚運以侍從官奉使

南來以其尊君命狀其行以謁余銘其狀曰公孝友之行出於天性其考僉正公諱夢翼病針刺公五歲驚呼而進願以身代僉正公遂書嘉賞語于紙上曰天生孝子僉正公沒公八歲每獨處輒呼爺號泣母夫人愍其疾強以薑桂泣不肯聽二十三陞上舍莊重寡言不喜浮華泮中咸推重焉 天啓癸亥 仁祖反正先是廢朝十五年摺紳章甫汨於利誘附會邪議者京外靡然 改玉日亟選守身不污者授公以金吾郎用扈從勞陞主簿以親老不自克解官歸養母夫人病劇斫指進血及喪毀幾滅性日繞墓哀省宵寐精誠慈顏感通則輒推枕而哭於墓南方有

丙穴之嘉母夫人嗜之公終身不忍食嘗有監察判官之命而以祿不逮養謝恩卽歸築室墓側以沒其世自奉甚薄而奉先洗腆執事婢僕必用其修潔者忌日必五日齋素滌濯具修必親監視雖疾病未嘗改也事伯氏甚謹待宗族極其睦鄉黨之間賢者友之不肖者矜之故俱不失歡心焉公文化人高麗大丞車達之後近世顯者副提學希渚爲僉正公祖而監察用恭爲考也公娶世宗大王幾世孫贈府院君慶祿之女先沒而祔葬于靈巖之清風院新兆女德俱備恤人之窮不計家有無四男長縣監誠吾次展力校尉慎吾生員昌吾進士亨吾孫尚運持

平尚載進士縣監出女壻申暹李徵善也尚輔得輔尚輅尚輦校尉出女壻趙晟漢宋基泰也生員女壻李晉命進士女壻郭壽徵曹一成餘幼持平誦公之言曰中庸是四書極致處須先讀章句章句有疑然後方讀或問諸書此於大學書朱子嘗言之矣其知見精實如此一方之宗師也宜哉其四矯之號亦必於其間有泐然會於其心者也是又可尚也銘曰學以知方以行其義又以爲教展也備矣存而鼓篋沒而祭社嘉哉莘莘南方學者

贈左承旨黃公墓表

有孝性篤至而天不報於其身而裕於其後者曰故

昌原黃公諱洞字汝涵也公八歲喪母哀號甚至久不食飯羹人已以孝兒稱後事後母極其誠愛人不知其異顏父喪啜粥三年日三哭墓自墓所免喪而歸則拜廟必流涕遂成疾而亦不止竟以 崇禎戊辰三月日年四十五而沒始祖河應高麗政丞 本朝居正刑曹判書曾祖湯卿典籤祖瑋評事考立中郡守妣 國姓豐山君宗麟女公自幼不習詞章曰此非所先也昏朝日有薦公於權門者公驚曰以我坐在京邑故有是矣即日挈家歸水原雙阜山下罕與外人接人皆稱以處士娶韓氏其考僉正應文也韓氏早寡事公繼母甚孝祭祀烹割不任婢僕勸課

諸子晝夜不懈卒皆成就六親皆稱之後公三十六年而沒祔于廣州沙村道成峴良坐坤向之原四男命者別檢世者郡守儁耆文科監司蓋者叅奉二女適士人朴自成奉事趙嗣迪別檢娶奉事安夢周之女生一子鎮生員女二人郡守娶廣興守朴知讓之女生四女監司娶郡守李文柱之女生一子釗生員女三人叅奉娶幼學金就兼之女生七子欽鐸鏞皆生員鏞鉅鏞而其第四曰鍵爲郡守後女二人朴有度長婿出趙瑜瑛瓊次婿出內外曾玄多不能盡錄以監司追 恩贈公承旨嗚呼公以至性篤行沉晦以沒天若不可必者而其食於身後之報如此天理

之定可知也此可以爲爲善者勸也余與公諸子孫
游習聞公世遂書此俾刻于墓石銘曰
幼稱孝兒長稱處士以此二者用示無止

九菴先生文集卷一百四十

九菴先生文集卷一百四十一
墓表

木川縣監庾公墓表

公諱軾字子敬庾氏皆祖高麗大師黔弼大師佐太
祖有功受封平山後有自平山移籍茂松者曰太子
少保祿崇自是累公累卿入我朝有諱益官判事
曾祖諱世琳副司直祖諱弘副司果考諱元英以武
功階授禮賓主簿妣玄風郭氏進士琳之女公以
萬曆丙戌生于沃川安邑縣生數歲已解文字就學
于鄰邑長老時有倭寇久在南陞本道兵使李時賢
領兵來住傍縣公挾書入轅門縱觀軍容仍援桴擊

大鼓軍中大驚公時僅八歲李試誅以軍法公不爲動辭氣自若李大奇之賜以文房物件以獎之母氏必欲成就公常夜課書親自挑燈以至雞鳴又致館客于家程督甚專自是公文藝日進兼通星曆地家說入而事父兄出而事長上聲聞驟騰交遊益廣嘗遊文元金先生之門先生亦愛之廢朝時赴舉于京仍入三角山寺讀書時廢母之議已起有數三凶徒聞公名至喑以利欲引去公卽撤榻南歸仁祖反正湖西章甫大會將上疏以請重峰先生追典能文之士各具草稿文元先生見公所述大加稱賞遂以入啓蒙恩崇禎癸酉中生員試先是主簿公

臨沒別籍奴婢以擬公科舉慶賞及是公力辭不受母夫人強而後始承焉戊寅母夫人沒公年已衰能執制不懈庚辰除大君師傅陞軍器寺主簿由掌隸院司評出爲木川縣監未幾以事罷歸庚寅正月七日卒于家其三月葬于家北鶴旨山配令人尹氏其考僉樞瑾也有婦德後公三年沒而祔焉男長仁字通德郎次陽字武科縣監季顯字出後季父二女婿李時泰朴正行也側出女一人通德一男曰昕二女適申煒成虎三側出六男一女縣監六男曰晟眞暹最顯最女適生員呂有衡側出二男一女顯字五男一女李時泰三男四女朴正行三男一女公天稟樂

易平和與物無猜救災恤患急於己私人無長幼賢不肖皆得其歡心以故戶屢常滿焉鄉居五十餘年無一毫以非義之事見議於朝評沃川自廢朝時以重峰先生享事互相排擯公雖持論甚峻而異論者亦不敢以吹毛索瘢焉公之行義此可徵焉當世名公卿如李判書景魯洪監司命者最相愛與焉余於公常事之以文公嘗以星曆推賤命而警之曰格中孤月獨明舉世一無相與者願少自貶焉余曰本自卑下無可貶者公曰是終不欲貶也星曆真不虛也因相與大笑矣今公丘木已拱而公言益驗矣遂愴涕而爲之叙如此云 崇禎癸丑月日恩津宋時烈

述

四山監役申公墓表

申生永植嘗誦其先考言曰世人多溢美而誣其親是不以死者爲有知也今閱其狀文皆質而可徵其狀者真知公矣哉狀中錄其遺戒一曰祠堂四面春夏無一草冬無點雪二曰墓上去草除雪必親至拜省三曰祭時奴婢前一日入齋夜半呼點有離次者黜不令執事祭後行罰殺牲毋先期以致臭敗或先食新物不可徧諸位只薦尊者齋日正衣冠坐廳事淨掃庭除仍監具脩婢僕無使喧笑滌器亦不可專任暑月易敗者盛置覆蓋注以新汲冬則度置房內

未雞起正衣雞鳴行事此皆其平日所自爲者狀又言公侍疾不就寢嘗截指進血居喪食不稻不脫經事庶母叔父三妹以誠以敬曰吾親之所親愛者也見同年人雖賤者加禮焉又好施與不屑屑於生產就水石間築亭名曰壽樂 崇禎辛巳春秋五十六十二月十四日終焉公高靈人名櫜始祖成用爲高麗檢校我朝提學檣議政叔舟最著曾祖碩淮縣監祖沃護軍考節度使景澄娶司直池景深女生公幼受業李體素春英李公愛之其字壽翁者李公所命也嘗蔭補四山監役以金吾假郎賜配人死公察其寃歸以啓光海釋之俄而廢 母議起卽棄歸聘冲

庵先生曾孫女金氏其父察訪益煉金氏有識量節度公在官欲益其家造對曰無不足者無子永植其所子也申君啓澄所爲狀蓋如此申君蓋兢兢焉歷舉公執友巴山趙平新平李駒八溪卞尚曾記若文爲質是不敢自信而信於人者余亦信申君且記昔年白川趙完堵言如此而又申生語余以不敢誣親余何敢諛墓也 崇禎丙午十二月日恩津宋時烈述

學生洪公墓表

公諱頤正字謹初其先出自上國唐李遣八學士來教國人洪氏其一也賜籍南陽麗代有由道官密直

司事其後冠冕連仍曾祖諱繼姓祖諱灃皆不仕考
諱純慤同知中樞府事贈禮曹判書妣李氏高麗益
齋齊賢之後成均進士潛之女公性孝嘗侍親瘠竭
誠湯劑溲矢之器親自浣滌五年如一日及其鉅創
致哀幾至滅性鄰里爲之隕涕 萬曆癸卯年二十
八而以三月初九日歿墓在清州治東廣大洞夫人
吳氏祔焉夫人叅奉景智之女男長錫夏次錫武通
政牧使女適林振華錫夏生男一源一亮一迪一章
女婿張恬柳東榮柳後惠錫武生一柱一運一極女
婿正郎李珉李東相縣監李錠李鍵林振華男女各
一內外孫曾男女摠四十餘人公以至性純孝不獲

神祐卒夭其年不得有所成就惜哉然不食之報著
於後昆旣甚蕃衍而牧使官聯治績克賁先德論者
以爲理終不爽焉牧使余姻家也稔聞公世故略述
如此云

靈光郡守崔公墓表

余從兄野隱公時榮翫麟自守獨與崔公琢字士精
相友每官餘必兀然相對終日不忍捨野隱公嘗曰
士精以其人地俯仰各途何官不做而乃自信不疑
不降其志其不爲人所知者以此而亦當有以此而
知之者矣其後公跡益畸困於朱墨米鹽踏蹙以沒
其世而野隱公殉節而死嗚呼世人終不知公而知

公者其惟君子人乎語曰不見其人但見其友斯實語也公全州人上祖文成公阿仕高麗官至侍中本朝有德之以清名直道當權掣韓明澮時見幾退老曾祖彥清官奉事有賢行累世同爨祖希壽歷典七邑爲安東判官見長官年少不肯折腰而歸世稱其高考應夏縣監有長者風沙溪老先生稱之妣尹氏司直慶祐女公弱不好弄長通經史年二十中生員光海昏亂謝塲屋不與進取與儕流疏論李爾瞻奸邪仍閉門不出者十餘年 仁廟卽位闡文科同榜有忌嫉者以故阻槐院選歷成均館學諭博士兼奉常寺奉事或爲假注書陞刑曹佐郎兼春秋館記

事官出爲黃澗縣監朝紳惜其去公曰夷險不擇臣職也公年四十時縣監公已沒公奉母夫人之官一心奉公不阿上官竟遭遞罷後由刑曹正郎除麟蹄縣監以親瘠未上而遞竟遭大故公時已向衰而執制不懈服闋歷典籍戶曹佐郎又出監保寧縣杖殺土豪之爲民害者坐是罷歸然當路服其剛果直拜兵曹正郎蓋將引置清選而又有慕間者阻之靈光物衆務劇素稱巖邑公又被差遣未幾謝病歸以已事追論謫居春川數月而放還壬辰正月二日卒春秋六十六公事親孝謹婢使之侍母夫人者待之加厚祭祀主於蠲潔儉身而易足家人大小常勤力而

自給故無所苟於人視世之奔走營利若將浼焉令人蔡氏宣教郎忠益之女古玉鄭公礮之外孫自幼喜閱圖史古玉愛而教育之曰恨汝不爲男子也古玉沒令人蔬食三年終奉饋莫及行甚執婦道尤謹於追遠之禮薦享之時益自整潔蘋蘩少缺則終日不樂每晨起盥櫛念過 仁宗大王行狀值其諱辰必涕下焉豈有所感於心者耶 仁祖孝廟昇遐久而不肉子孫以年老強之則曰女子獨非臣子耶晚年手寫女誠之俚翻一作者屬之子孫永爲家訓年七十八而終於 崇禎乙巳祔葬揚州養正里男世榮以蔭入仕次生員世章有才無年孫男邦彥邦蓋

邦顯女爲宋彝錫許珩妻者長房出邦儁邦式女爲李重郁金遇華妻者次房出曾孫摠若干余從野隱公識公蓋久丙丁亂後余入黃澗之深谷日夕相從道語世變而慷慨歔歔一日指壁上所書曰此仙源相國取義時語其語曰日暮江頭臣力無何公泣下不已曰人臣義當如此日今天地翻覆倫常夷滅吾輩無以自立於人世矣因及野隱公曰當時見其守己而已知其有養也噫公與野隱公真曠世之知己也哉至今四十年世道益下相國祠堂薦以虜朔而其人大爲一時之重使公而在復以爲如何也九原不可作嗚呼歔歔矣邦彥有文行以親命來謁余銘銘

曰
彼趨而我止兮故己後而人先跡雖困而心則亨今
斯其所以賢乎

進士金君墓表

曩在昏朝 聖母幽廢彝倫斃塞當時致命抗節以
存大防者固宜無多而自守潔身者何少也湖南之
南原府有金君諱沈字長源者 萬曆丁巳名進士
也故高麗名賢址之後進士錫良之曾孫察訪光之
孫都事益福之子君家居修行爲鄉黨所稱旣成進
士同榜諸生附金墉議謝恩日將上章以助之君卽
揖諸生徑歸奮然有上書極言之意屬草稿已成宗

黨交謁更諫故不果上知有其事者密告于元兇知
舊代怖亦懼及焉無何 仁祖改紀君自丁巳以後
不復應舉 仁祖十五年爲 崇禎之丁丑也自是
復謝絕世路遂構一室于山水之間徜徉嘯傲自號
陶村居士其清修雅致必有以自樂者而人不知也
竟杜門以終辛卯十月七日也年六十五君扶安人
妣安氏己卯名臣處順之孫處士瑒之女安氏家南
原故君自其考寓居焉墓在府東風谷里配宋氏後
沒而附焉宋氏礪山名族高麗光祿卿惟翊其上祖
而考處中嘗爲縣監閫範甚可觀男之鳴進士之聲
文科今爲正郎之重之白並生員而季爲教官女爲

司諫李尚馨之子文源妻內外孫曾男女摠若干余
先君子睡翁公與君同年進士當時隻手扶義阨窮
而不悔今教官以君行事來示而請銘遂相對愴涕
而書之如此嗚呼君之志非不如古人其所樹立亦
非餘人所及而晚際 聖朝亦不沾一命終於蓬蓽
豈非命也耶然含章自貞以 萬曆進士題于墓道
則其爲君嗟惜於不遇者是惑也不然古之時以不
遇而仍見者何故也時 崇禎丙午九月日恩津宋
時烈述

僉樞 贈兵曹叅判李公墓表

白沙李文忠公諱恒福葬在抱川之楸谷其左十五

步西向之墓卽其男僉知中樞府事 贈兵曹叅判
鰲興君同知義禁府事諱星男字某之所藏也文忠
公在光海朝謂 母后不可讐遂謫居北塞而卒公
以喪返葬仍杜門不出公年蓋三十仕爲繕工監監
役由殿中爲楊口縣監時文忠公已去位郊居矣方
伯乘時沮僂公公卽棄歸盖公持身不苟已如此
天啓癸亥 仁廟改玉卽除黜宰以私故不赴俄超
拜韓山郡守時大夫人尚無恙食其俸二年遞歸歷
忠勲府都事翊衛司翊贊廣興倉守憂吉又歷中樞
府經歷司贍寺副正兼內乘以宗親府典籤陞通政
僉知中樞府事盖用丙子扈從勞也爲利川府使旋

遞歸復舊踐復出爲鐵原府使壬午遞歸而歿享年六十五公賦性嚴毅器度卓犖祭祀以禮墟墓必哭其孝性然也居官清謹節用治民以惠養不擾爲本雖以翫髒齟齬於世而亦無悔色前配權氏判書徵之女有婦道其繼金氏判官李男女皆 贈貞夫人金氏常執謹丙子江都陷夫人匿巖穴間遇賊奮罵賊亂斫之落巖下久而得蘇年五十八而歿於丙戌男郡守時中女爲府使崔煜妻權氏出也進士時挺牧使時顯學生時望三女爲生員李廷煥別坐南斗相縣令俞枋妻者金氏出也進士與郡守妻尹氏並命於江都尹氏罵賊與金夫人同云郡守男世章世

萬世馨世章郡守進士男世冕牧使男世龜其繼時望者世萬也其餘不能盡錄公先系俱載大墓刻銘曰維茲楸谷之原維水瀾瀾維嶽崇崇維文忠公衣履將百世而安寧維公墓亦無艱於無窮

永崇殿叅奉申公墓表

不係世類此古語也觀於申氏之門可異焉高麗按廉使祐哭墓有雙竹之瑞其九世有孫曰之益三歲而孤稍長其母泣謂曰汝勉之寡婦之子人所鄙夷遂從西溪李公得胤請業西溪奇其警敏曰乃翁有子矣年十四五盡通經史長於詩屢占解額性剛疾

惡嘗上疏斥爾瞻之姦兩司請拿鞫又上疏言益切中外驚懼公不爲動孝性純篤母病革沐浴齋戒炷火掌心以禱北辰又割指進血及喪任情哀毀吐血數升每哭泣絕而復甦羸病已作而亦不脫經帶不離衣次饋奠之暇讀禮不輟服闋構精舍於冶溪之上取程子涵養吾一之語扁以養一與西谿玩易齋雲烟相接往來從游講論無倦 仁廟初屢擬官不做其後大臣舉孝廉除叅奉職棄歸丙子之變聞媾成 世子入質痛哭不食自是永無當世意年六十卒于 崇禎己丑系出巨濟令同正晉升其始祖也按廉之六世孫 本朝直長幹有戒子訓語子彭

齡嘗手書晦菴訓子帖以授二子其季公之考櫓也篤於文行捷司馬而無年妣主簿金垣女配全氏有婦德無子一女適曹瑗取兄子鐔爲嗣鐔與其從弟鈇亦皆孝子 孝廟及今 上朝清州一鄉具述兩世三孝事迹聞于官禮曹論啓皆 命旌閭鐔有一子應泰也蓋按廉有二子自是派分多在嶺南鄭文肅公經世嘗有墓文記其六世孫元祿以孝趾美旌門而其在清州者幾於泯沒今幸 孝理之下俱蒙恩典嗚呼休哉此豈非世類也耶大雅旣醉再言永錫者其爲風化之助遠矣時 崇禎旃蒙赤奮若暮春日恩津宋時烈述

通德郎李君墓表

世宗莊憲大王別子曰密城君琛其曾孫曰 贈廣
原君耆壽子曰僉正克綱子曰監察申祿以 萬曆
己丑生子曰德輿有才無命卒以通德題墓道始君
好讀尚書早喪父母與從兄白江相國諸公事祖母
鄭氏每五日一設燕席丁卯有虜寇已謝京邑卜居
驪水上先壠下丙子遭天下亂益自弛置性嗜酒遇
輒舉白自浮醉則朗吟淵明歸去辭當是時心境夷
曠萬物無足以嬰其懷况財利則尤泊如矣韓叅判
必遠君妹婿也見君析著時所爲歎曰非今世人也
當路諸公欲君一至京師兼且惜其賢嘗擬齋郎而

不做君聞亦悠然也君風度溫淳不甚檢束而人亦
未嘗慢教子孫以朴實爲務子孫至今遵奉焉字得
夫享年五十六妣全義李氏配沈氏其考愉實青松
大姓生子五人先君歿而祔焉六親咸稱其慈順長
子敏達次敏覺敏中敏成皆早沒今比安縣監敏道
其第四也孫世蕃世茂世蔓敏達出世茂進士世苾
世郁世珎具文濟妻敏覺出世珎出後敏成而具爲
郡守世馨世積世馥敏中出其一女幼比安長女爲
朴泰延妻其二女一子幼君落拓不遇而子孫蕃衍
魯衛鄆郇之序固將與國無窮矣又奚憾焉其沈冥
沒身不獲世之滋垢亦非庸衆人之所及也銘曰

市無珊瑚巖棲百層無事飲酒醉臥不興仍葬驪濱
其水如渾

郡守尹公燭墓表陰記

公字晦叔坡平人世系具在其高祖同成均倬大碑
所謂忠世卽其考公武科至郡守居家與官以順善
稱年四十七己卯九月十三日卒葬成均兆令人高
麗判院事宋大原後考 贈贊成甲祚大有節事在
國乘令人聰明絕人涉獵書史今古事一經耳目終
身不忘 崇禎丁未閏四月九日没于懷德贊成公
墳菴而歸祔焉年七十一無子以公再從兄掌令烜
子季舉爲後亦無子大懼後人殘毀其墓令人弟恩

津宋時烈書石以表之嗚呼悲哉翌年戊申二月日
書

贈吏曹叅判孟公墓表

公没而葬而遷而十五年其次胤觀察君胄瑞樹表
于墓前其崇幾尺其廣幾尺其面額之外尚可篆若
于語觀察君來謁余文余曰公之詳旣具於誌碣之
銘而皆當世之高文偉筆斯足以不朽矣又何贅爲
旣而復曰今茲世國家艱危卹卹乎其忠義之可思
也自丙丁以後文武士非惟諱兵而不言或乃以讐
人役爲當然厥或以自強洒耻爲言則撐眉弩目怒
其言以相加者滔滔也公於此時獨能隨其所在而

修器械肄坐作繕治城壁儲待粟米以爲當用卽用之資又上疏勸上以立大志存遠圖嚴軍律振士氣爲務此豈非自拔於流俗而不顧人之訛笑者耶然當時則破敗之餘百爲厘厘又且中州之域盡輸於瓊表公之齋志而沒也宜矣屬今中原有事而國勢稍振正祖士雅擊楫之日而顧乃小大敷同惟燕雀之處堂是樂此余所以獨思公而不能已者也記昔文元老先生之葬也余與公同在加麻之列見公哭泣之哀其後先生之胤叅判公槃在京城西余與公皆適比鄰朝夕來往見叅判公道語事契之重今俯仰之間倏焉四十年而天時人事之變遽

如許矣嗚呼余之獨思公豈惟懷舊之感耶然又豈易與俗人言哉聊書此俾歸篆焉

李君復吉墓表

文元公老先生蒙難南歸鄰有李君復吉字亨彥與其從兄弟恆吉咸吉朝夕服勤先生沒加麻以喪之立祠俎豆之蓋如朱門之二滕也君全義人高麗大帥棹之後世爲甲乙族本朝貞幹年八十孝養其母母年百二歲世宗大王以爲世所稀有賜書褒嘉焉後謚孝靖寔君七代祖也高祖克文縣令曾祖應奎司直祖憲通政是生主簿惟康主簿娶密陽卞應龍女生君年三十九天啓丁卯國家有虜亂老

先生爲號召使授君以軍興之事蓋君爲人篤實當事必舉先生常以幹局稱之至是果辦其事又出家財以補焉難已先生舉實啓聞朝廷爲設武功職以酬之初付司圃署司圃轉陞儀賓府都事君卽家食事老先生如初 崇禎乙酉五月廿四日卒得年五十七葬于連山縣西月午山甲向之原配完山李氏忠義衛宗臣女先沒而祔焉男希冀希苾四女適安廷煖蘇爾延黃羽漢柳穗側出有男女男希茂希冀生慶果承果希苾生仁果義果禮果智果二房女凡四人內外曾玄摠若干君奉祭祀以禮待宗族以睦與人無所競先生愛重之又在先生門下者君必有

以資之故其自遠者多所賴焉嘗學家禮有所錄訓語余與君同門久詳知君爲人希苾故來請銘焉

永同縣監金君墓表

沙溪文元公金先生蒙難于昏朝退歸連山之村舍杜門講學其同宗子廷望字叔遇首詣門下請業老先生甚愛之教以心經家禮等書君自以爲質魯勤師益篤千百之功其危坐處茵席皆穿年廿六寓居京裏婦氏家賊臣李弘老以君爲先生弟子也頻數來見君終不迴謝又遇正言李孝誠陽醉繫孝誠之頸曳出門外曰汝是無母之人何忍相對蓋孝誠主廢母之議者也年三十一老先生薦以孝友謹身

拜內瞻寺叅奉君以祖父年老辭 崇禎丙子李相
公弘胄薦拜重林察訪略就供職爲養繼祖母辭歸
冬聞 大駕播遷挺身勤 王路塞不達聞 廟社
及元孫移住江都間道赴之亂已拜桃源察訪又以
繼祖母辭後又拜金井察訪悉去弊瘼方伯將褒啓
以君力止而止遷內資寺直長因陞典牲寺主簿李
相公景奭薦以孝廉拜永同縣監未及赴任而卒丙
申四月十二日也享年六十三葬于公州臺洞山壬
坐之原配朴氏後沒而祔焉君性至孝爲父母掃塵
必拘袂使塵不及焉嘗書孝友二字于掌內以自省
焉及娶婦與共忠養衣服飲食不任婢僕侍疾不解

帶又血指以進居喪未嘗見齒啜粥期年前後五喪
皆然其妣旣寡有所喜隣媪君常邀使在傍與羣弟
同爨擇其家產之良者以與二妹嘗不遇于其季父
始欲相害君事之益虔卒得其歡心周卹鄰里不計
有無有告急者則使往田間任意刈去不問多寡嘗
語諸子曰學者立志必師先聖吾學不知方行無所
成所願則學曾子耳故其事親之誠至深且篤嘗有
王祥孟宗之孝感隣里皆驚異之連山恩津二邑章
甫以君實行言于方伯轉聞于朝遂有表裏之 命
君之羣行綽綽者如此老先生之愛之也固宜老先
生沒後慎齋先生又親而重之君沒時慎齋又將易

簣矣君弟廷說往謁則扶而起對哭甚傷焉君光州人考定略將軍珽與老先生同爲左議政國光五代孫祖叅議成輝曾祖秉節校尉鈞高祖副護軍忠胤妣成氏掌令軾之女朴氏考弘彥祖監司慶新素性慈仁明敏甚有婦道五男重鳴重昌重亨重慶重熙三女適李昭載洪克徐文博內外孫曾若干君四歲遭倭亂其乳母棄之林中而去翌日乳母尋至則君凝然堅坐而有虎守其傍人以爲虎性孝故以氣類相感而然余與君爲同門友詳知其實行又老先生兩世視君甚故爲之銘

崔君應生墓表

君諱應生字望之君嘗曰吾京城士族遭亂流落又贅九女家至老或連日不炊終歲不裁衣子女時泣牛衣甚矣吾貧也然吾拙故貧寧守吾拙以死不欲爲非義人有侮慢者則君受之而已君又曰吾不耻窮困而惟婚嫁不售漸至陵替吾先世貴顯誰則知之是不能無恨爾年六十四卒 崇禎丙戌八月十七日也配宋氏祔焉墓在清州周岸縣塔山里君外曾祖冲庵金先生宅兆在其右岡君全州人其十世祖阿高麗平章事世仍大顯六世祖德之集賢殿直提學有名德自號烟村迂叟鄉人立祠享之高祖智成監察曾祖浩文部將娶文獻公鄭汝昌女祖彥清

奉事考者壽前娶大司憲具壽聃之女後娶君之母
金氏宋氏考錫昌高麗判事大原之後五男琨璵璿
瑞璐二女爲鄭鳴鎬柳德培妻璿有至性親瘠斷指
又善喪人惜其夭璐亦有過人行琨男基永基百女
適閔繼重璵男基重基載女適柳時惠餘幼璿男基
萬基億瑞男基漣三女幼璐男基顯鄭柳皆有育內
外曾玄總若干世有富貴而見惡如鴟鴞又無子孫
死而其鬼餒而者多矣君其肯以彼而易此也歟

進士李公墓表

李侯汝壽先公諱後地字厚也以 萬曆甲午元日
生己酉五月二十九日沒在世並餘分只五千九百

餘日矣噫人生百年三萬六千日而是僅七之一強
矣靡汝壽母子則哭之者當以月筭焉嗚呼何其短
耶然其未至於是者亦多矣獨於公人人惜其短者
獨何歟公天分甚高五歲母夫人成氏恠其之厠久
往視之有大蛇經其前油然謂母夫人曰吾驚動則
恐爲所螫故遲之耳聞者大奇之見伯氏被楚於先
考大諫公則必流淚滿面大諫公常爲之止居常未
嘗有急遽之色亦未嘗以傲言加於同輩然論人是
非則灑然有出人處鄰有僑生有文名公獨不肯見
曰非吉士也後其人果犯敗常之科其行義見識如
此故多有折其行輩者噫其質之厚重足以享其年

而氣之清秀所以局其數也歟使假以年則其所成就其可量歟嗚呼其可惜也歟汝壽母夫人莊重慈惠其外王考韓忠靖公應寅鍾愛育於家擇對而歸之公纔六月而公沒夫人欲自盡下從而以有遺腹故隱忍不果則潛篋小兒燕謀以擬之蓋將以解脫之日爲畢命之期也家人覺之防之甚謹故不得如其志其遺腹兒是爲汝壽名河岳其慈愛可謂至矣然有過則涕泣而捶楚焉事舅姑盡誠舅姑亟以善事稱之待娣姒有恩下逮諸姪孫婢僕俱得歡心尤致敬於奉先宰割烹飪之任雖老不許人代之每遇公忌日自月初不肉傷慟如始喪時汝壽旣長捷司

馬入仕屢典郡邑夫人聞有鞭扑聲則必使人止之嘗治賊黨連仍甚夥夫人戒之曰恐有無辜者橫罹故汝壽承教惟謹隨有善稱焉夫人生于壬辰二月十八日丙申正月三十日終于汝壽任所榮川郡新卜廣州聖林村卯向之原遷公墓而合窆焉汝壽階通政今爲忠州牧使生男世萬世億世正世載世恒李壽舅尹擷其女婿也李文科佐郎世萬男宜茂宜芳宜苾餘及世億一男皆幼宜茂生一男內外曾玄孫總二十餘人噫不羸其躬者必裕於後福善之道此其徵也夫公龍仁人高麗壁上功臣大師吉卷是其上祖曾祖蓋忠兵曹正郎祖啓仁成均生員考諱

士慶妣成氏籍昌寧考希益爲郡守夫人系璿派
成宗大王六世孫監察樞是其考吾兄弟與汝壽交
好甚篤每相拜其母佳辰令節上堂進酒歌嘯舞蹈
因熟知夫人之德善而又溯公刑家之風範也今二
母俱不可見而兩家兒皆老大孤露矣汝壽求余記
其墓石遂枚涕而書之如此公己酉秋取進士解禮
曹依例追給進士帖故稱以進士云公沒周甲之六
月日恩津宋時烈述

贈叅判崔公墓表

大司諫崔公諱鐵堅自號夢隱其孫繼昌字宗叟年
二十七而歿于 天啓辛酉後六十八年其子大憲

公寬泣謂德殷宋時烈曰嗟嗟我父尚忍言哉吾年
九歲而棄我其顏貌亦未能記何況其心志言行乎
嘗問于祖父郡守公諱某則但曰汝父行義超凡亦
嗚咽不詳言問諸宗族則曰噐字明粹操行端正孝
友兼至持家有法親戚敬愛朋友推重問於平生執
友則曰才識過人發軔正路已知天理人欲之辨矣
少從石洲蔥山喜好高行非古人不學聞過必改見
義必勇深以虛譽過情爲耻石洲被淫刑以死親戚
不敢問乃父辨治其喪經紀其家後再娶石洲女爲
妻識見明透論人吉凶後無不驗若燭照龜卜焉見
昏朝失道爲潔身避世討每與人語及至於流涕嘗

病兩股痿痺經年不能起後忽不醫而自能行步蓋
託疾避禍也夢有人告之曰以耳視以目聽曰此鬼
神告我也以此居世免矣夫因自號曰目聽嗚呼我
父平生得於聞知者如此以此推之其餘可知也今
欲記此於石以樹墓前子其矜而聽之余與大憲遊
久矣以大憲已知公風彩今聞此語顧何忍辭以不
文既序其語而繼之以辭大憲又曰吾世系已具諸
碑刻不復詳焉吾母李氏府使禎慶女也吾弟宣憲
石洲外孫也吾有子世柱世楨世柱進士賢而與其
弟俱夭有一子祥吾弟宣叅奉有子厦柱翊柱泰柱
厦柱進士憲有子廷柱進士余曰君之有才無年是

天道之舛然大憲公能繼能述卓然有立羽儀清朝
此豈天以是報君也耶辭曰
退之有言天固生之耶天殺也耶莫不歸於死壽何
少多今以此銘君其悲奈何

金泉察訪黃公墓表

察訪黃公沔字宗之嘗遊沙溪老先生之門時門徒
盛多公甚爲儕流所推而谿谷張公維寂與親愛公
生於 萬曆乙未年三十九而沒後四十一年其胤
判官震者以余亦嘗事老先生者使其子鼎夏求銘
其墓表曰吾父不幸早世其行業無得稱焉然事父
母處兄弟皆爲六親所頌又資性端潔光海朝人之

聚臚者滔滔而吾父能閉門獨居以故亟爲明時所
收錄居喪過哀竟以毀沒世吾早孤故所記者只此
而已餘不能知也余曰銘如是足矣公昌原人上祖
河應新羅政丞 本朝領議政居正策開國勲封義
原君曾祖湯卿 贈領議政祖璋評事 贈都承旨
考立中屢典郡邑 贈左承旨妣趙氏直長應聖女
公 仁祖癸亥除四山監役求免旋爲金泉道察訪
以憂去職而卒配李氏牧隱先生之後其考判書顯
英先公四年而沒賢有婦德後娶彥陽金氏及第宗
海之女李氏生二男其季曰泰耆二女適李星徽楊
汝纘判官二子三女季子進士一夏而李鳳齡蔡壽

胤沈廷老其壻也泰耆四男二女幼李壻男儔楊男
曰萬寂而壻則呂尚齊也余謂古語曰不見其人見
其友今觀所與則可以知公者不獨內行之篤而已
也

利川府使 贈左承旨柳公墓表

扶餘使君柳侯璋持其先考府使公狀來託墓銘噫
吾與侯俱是故李正獻公諱潤慶之外裔媼好之篤
非一二世也雖老且病何忍辭爲謹按公諱景紹字
而述文化大姓也自高麗大承車達以後圭組之盛
他族莫望焉入我 朝有諱洙策勲封君位躋叅贊
贈謚安襄於公爲七世祖高祖諱胤宗司僕寺判官

曾祖諱沂文化縣令 贈執義祖諱惟寬濟用監奉
事 贈左承旨考諱諱漢城府判官 贈左贊成妣
韓山李氏禮曹判書懿簡公諱增之女以 萬曆丙
申生公公自髫髻已有文華筆法未成童赴試場其
寫卷時觀者如堵而咸嘖嘖焉拆號日與羣兒立街
上有持名紙而過者公名在其中公不色喜動止如
常聞者知其爲大器也年二十八中生員罷榜翌年
高中進士爲義禁府都事例陞直長主簿遷戶曹佐
郎爲陽智縣監丁內外艱先是應明經科旣通於詩
書易論孟中庸時父母皆年高聞而喜甚並立門外
以俟大學之報公錯一字竟不利父母大落莫至於

垂涕也制旣終人曰君於經書有前功可復取應公
曰吾恨之當時父母情境不忍思也今日復誰爲榮
歷祥雲察訪禁府都事歛谷縣令礪山高陽載寧三
郡守刑曹正郎交河縣監工曹正郎利川府使江華
經歷而終焉前後涖官皆謹守法度去後立碑以頌
之者凡五官也亦或有繡衣褒啓則其居官之善可
知也公孝誠篤至臨終值忌日猶蔬食哀慕與其二
兄友愛彌篤平生不言人短長以故人無不愛之以
丙午十一月二十一日卒得年七十一墓在高陽治
西古郡坐庚之原以扶餘從勳追 贈左承旨配驪
州李氏考縣監 贈左承旨諱大濬也與公同年生

先公十六年卒而祔焉扶餘蔭仕以才請稱女適縣
監李志遠士人金萬憲正言安塾士人洪壽元徐文
赫側出男珩女爲金夏重妻扶餘男重榮重顯重碩
女壻士人崔寓李道成李志遠二男士人世珪奉事
世瑜金萬憲二男一興一亨一兌一亨進士女壻士
人許堪李萬貞安塾男壽顯女壻士人金激進士李
世奭士人李碩相洪壽元女壻士人李審徐文赫男
宗厦女壻士人趙障餘幼噫公少以文藝名人與己
所以期待者不淺淺也不幸差池困躓終於下僚豈
非命也然子姓蕃衍繩繩不絕不食之報其在是歟

學生朴君墓表

朴生世振世奎世輝世徵等謂余曰吾祖近仁年二
十九而没于 萬曆癸丑祖母鄭氏不忍其慟卽自
盡下從卽同窆焉吾祖早世無可稱族黨只言早有
文名氣貌雍容云爾考生員應臣其系略具其墓表
鄭氏籍迎日父台壽兵曹判書淵之後余曰朱先生
嘗銘某氏而著其守門戶不嫁曰盛年苦節宜享其
報况鄭氏之大過人者乎宜天之報以子姓之多也
一子尚蘭生男六人女六人一男三女庶出也墓在
懷德治南雪朗里生員葬在其東麓數十步

尤菴先生文集卷一百四十一

尤菴先生文集卷一百四十二

墓表

贈察訪梁君墓表

沃川郡人嘗以狀聞于地主曰郡居梁應洙年未二十喪其父能善居其喪又善事其母又善其兄弟仍舉其羣行可徵不誣者若干事事遂轉上于朝選曹擬官未做而君已以 崇禎戊寅年四十三而沒其後郡人復申前說以乞追典遂有金井道察訪之贈焉君南原人上世有能讓爲高麗大官 本朝誠之官贊成大提學封南原君其子瓚爲承旨是生淑爲牧使而監察允信司勇思近學生諱是君曾祖祖與

考也外祖金峻上洛伯方慶之後君媿河陰李礫女
生女適縣監李惟謙而子以松以栢以栳以樟女爲
金亨斌妻者繼媿郭氏出也以松亦以孝行贈察訪
其男熙載熙世熙周熙緝以栢男熙績以栳側出熙
叙熙重以樟男熙道熙遇側出熙延李惟謙男賴生
員賴賴類君以京華右族介然處鄉里間不事交遊
而鄉黨無異辭以稱其行而亦有濟美之賢子苟非
篤於己而化於家者烏能如是哉是可銘爾墓在郡
北化仁江上依法族以位云時 崇禎甲寅月日
恩津宋時烈述

黃澗縣監閔公墓表

有問閔公晦遠於同春宋公浚吉者同春日閔宗之
第一也余謂閔宗之多賢他族莫望焉此文雖賢奚
至於是意同春惜其年老沉滯有所激而言也豈亦
他族也則雖爲第一而不足多故因以見閔之多賢
也歟未幾公宰黃澗縣聞其爲政仁恕剛果雖涕咨
於窮民犯義則不貸以故其人敬信而畏愛又未幾
公年七十五而沒於 崇禎辛亥之五月廿八日遠
近聞者莫不嗟歎恨世之終不知公也旣而余與其
胤泰重游知公之有教仍見其狀公行及世系知公
爲振衣公汝任之孫署令公斡之子監正朴公世茂
之外裔然後又知公之賢其來有自也因據其狀而

考其行曰公自十歲時執子弟禮不怠振衣公特愛之妣朴氏早沒公任家務竭誠以養弟妹署令公丁憂廬墓公不離側手具饋莫事庶母如母視庶弟如同胞自丙子以後輒棄舉子業遊放山水間翛然有出塵之懷樂靜趙公錫胤秉銓人有薦公者樂靜曰我知此友不須相汚也晚雖爲貧暫屈而常有不樂意歸處鄉里構一室扁以忠孝蓋振衣公所詔也日必早起掃灑室堂整飭衣帶冲澹自適噫斯亦見公之爲人矣乃知同春之與人不苟也公諱光赫閔氏出驪興驪興之閔爲東方名族不須詳其世也公癸巳始仕自司宰監叅奉歷司饗院奉事繕工監直長

陞掌苑署別提又歷通禮院引儀兼漢城府叅軍時鄭公濬爲其府判官皆能不畏強禦不計利害號稱其府得人拜真寶縣監未上而遞其爲黃澗瓜滿而歸則丙午冬也墓在水原嘉士谷丁向之原東去振衣公葬十里而遠配金氏桑村自粹之後其考豈也三男長致重有孝行早沒次就重季卽泰重女壻三人金鼎泰宋國憲洪蓋也致重子鎮嵩鎮喬女李翊夏就重一女鄭道東泰重無子以鎮喬爲後曰允謙允諧允誠洪夏成李鳳瑞韓世蔓妻金壻出奎煜奎炫奎炳奎煌李尚徵金用兼妻宋壻出洪壻有一女李鼎齡余晚始得拜公公風神灑然語纒纒無妍媸

論議皆正直可知其心所存而其不爲世所知者尤可尚也抑同春公其顯微闡幽之言歟銘曰

惟振衣公忠孝傳家公爲其孫謹守靡他宜顯而否惟理之頗有君子人有言孔嘉我記于墓百世不磨

贈戶曹叅判尹公墓表

尹君理自承旨爲慶州府尹

贈其祖考司禦諱泳

爲承政院左承旨考諱止善爲戶曹叅判兼同知義禁府事都摠府副摠管妣李氏貞夫人坡平之尹自古爲大姓始祖莘達祖麗朝壁上功臣自後世有達官名人 本朝諱仁鏡領議政無嗣取從兄郡守仁復第二子諱侃爲后燕山朝有諱哲以司諫數直諫

終被泉壤之禍實郡守公之考也祖考諱思欽慶尚左道水軍節度使妣淑夫人長與任氏不仕諱諒之女叅判公事親孝甚雖在布素便身之物無不畢具嘗避兵亂擔輿而行至於肩磨而人不見其疲倦色無不歎嗟性淳朴任真不事生產贅居星州視婦氏財如無覩也采椽脫粟人所不堪而常晏如也慶州君爲郡邑嘗以一介不取勛之若奉以酒食則戒之曰此亦出於民也故慶州以清慎見稱焉 顯廟末年推恩侍從父母 命奉道有賜資奉道屯膏未及拜受而沒沒時年七十七時 崇禎後癸丑七月二十日也配李氏高麗大師棹之後奕世冠冕考宗澤

將仕郎禮賓寺叅奉 崇禎辛巳年四十七而終于其九月二十二日公沒改葬星州伐知村後同原異室五男琪琬玳瑾慶州其季也二女適金震鏊蔡生晚側室男瓚瑁四女李元穉李光載朴秀元朴宗吉也琬生男商來四女適宋燧柳沆鄭熙楫金之紐玳生男鳳來聖來朋來二女適金相九李延齡瑾生男鼎來謙來觀來晉來升來女適李先稷理生男昌來錫來益來陽來二女適姜素相李顯命李生員金震鏊生男之經之綱五女適朴文徵曹逾李宜楫朴聖胄宋玄基公以淳朴之資任真循分與物無競李夫人亦溫仁淑慎以孝婦見稱然公不求人知不成一

名天道報施識者疑焉然而子姓振振且有能子立身揚名有此追榮天道果不僭矣爲善者可以勸矣余與慶州善來託墓文云時 崇禎著雍執徐孟冬日德殷宋時烈述

楊湖處士閔公墓表

仁川儉義洞向酉之原有墓曰故楊湖處士閔公業子昂衣履之藏也公父友仲母金氏公出後仲父僉知友孟其配趙氏贈判書揚廷女公幼而穎悟絕人孝友出天舅氏趙玄谷緯韓稱賞其句語及光海朝姦臣倡廢 母議公驚隕憤慟絕跡公車杜門讀書寡好孟子每至性善養氣之說必三致意焉 仁廟

卽位文元公沙溪老先生承 召入京師公踵門請
學又從而南歸受性理諸書講明理氣四端七情人
心道心之說雖羅整菴自謂所見超詣公必折衷於
栗谷之說以爲栗谷則朱子適傳也先生愛重之妻
以族人女丁卯以所後考妣喪已出壙而邊報遽至
避亂人哀公呼擗於路上助舉柩至壙而去旣葬猶
啜粥寢苦以終喪遂成痼疾床褥八年而後始愈丙
子虜變公聞朝家和約成有曾連蹈海志塞竇不出
清陰金先生自雪窖東還公迎拜之以許曾齋出處
質問焉蓋栗谷先生嘗以曾齋仕元爲失身者故公
就正焉 孝廟初服聘召清陰慎齋諸賢於林下講

論天下大義公喜曰此千載一時也遂往來商量公
意蓋憂諸賢當此板蕩之後事未成而禍已至也其
後果然公四有 除命而皆不就唯自守其志而已
蓋公獲從大賢習聞洛建旨訣而其大規模嚴心法
者泯然有會於其心蓋將不怠所從不知年數之不
足公可謂能自得師矣慎齋金文敬公嘗愛公甚易
簣之際屢字公而願見焉蓋欲有所託矣公平居盥
櫛端坐不與人往還而薦紳學士向風慕義多造其
門焉晚而不樂城市築室楊湖上左右圖書對越神
明者幾十年矣與昆弟比屋同門娛侍母夫人門庭
之間和樂而肅穆也公終不出爲世用而其衛道憂

世之心未嘗一日忘故其論當世之務舉事論理不爲空言矣吾友鄭公養抗厲守高於人少許可而至於公每意愜而心服歸其女妻公之子於此亦可以知公矣公之世曰高麗平章事令謨爲上祖 本朝都評議事開寶我 元敬王后之叔父也屢傳至曾祖諱季良官縣令栗谷李先生實銘其墓祖諱濬叅判能以清白世其家公配李氏事君子無違德先公卒男長世益次光益出爲人後仕爲叅奉孫曾男女若干人余於公居止遠不能源源往來而猥蒙公知獎自以爲世有知我者矣公沒而家有變禮羣憾肆兇幾陷大戮而公之嫡孫慎竟至投荒不幸甚矣以

公之善而後承不蒙休佑天何以勸善人也

炭谷權公墓表

蓋當時論携貳之世有不失赤子心常以借之大道語乎朋友者曰故炭谷權公諱諤字思誠也公旣沒余追原其意而爲之說曰西銘之道廣矣大矣父乾母坤同胞吾與則凡有含生之類皆在所愛之中而惟有有我之私故一膜之外便成胡越而不相通貫也西銘之意蓋所以病此也公其志乎此者歟然西銘實理一而分殊苟歸乎一偏則亦非大中之道矣論者或病公之偏於理一未知公之果然否乎而然其所以病公者實所以知公也公出言制行處家接

物無不率意任真絕無矯飾雖未知其一循乎天則
而其一循乎本心則可信無疑也故其在家在邦無
有怨惡惟顯廟初禮訟之際公所上一疏未免入
是非叢中其以善道爲讒諂媚嫉而又以爲敢言之
士其以無狀賤臣爲祈天永命之本而又以爲人不
敢言其非其上一段似相矛盾而下一段又欠稱停
故世人喜以爲訛然其所以知公者實在於此也此
其顧傍人是非計自己利害者耶蒙陋淺識幸於此
偶然窺闖故服公之心終始不異而妄亦自謂庶幾
乎受知於公也使公而可作則必脫賤臣於惡逆之
律矣嗚呼孟子屢言大人之事而論其本則不過赤

子之心而已張子之學實繼孟子而西銘之書爲其
至者蓋未有失赤子心而能志乎西銘之學者也然
余所論公者未敢自信其庶幾而惟公平日受用之
實則公常誦其先訓曰凡事必求是毋落第二義嗚
呼雖使程朱復起其何以易此哉公旣於此用功則
其於孟張之學何遠之有哉余性褊駁粗戾用力雖
深而終不能變化以效公之萬一今以平日竊矚公
者書公之墓石使其不昧者存則未知公感然而不
居乎抑將莞爾而笑曰世人皆不知我而惟某獨知
我乎其將曰世人之知不知我皆如浮雲而子何必
如是闡發也云耶噫

南原尹君墓表

尹醉夫潔長源以清名直道死於姦賊士林至今悲慕有弟名混慟其非命歛跡鄉里亦以遺戒子孫是生大亨君其所生也母朴氏忠原大姓君好善飭身嘗見擊蒙要訣歎曰粟谷真聖人也臨終亦令人讀而聽之君可謂守死善道者歟古人有言曰愛其人並愛屋上烏若君之善自有可愛者矣不但爲醉夫也君諱晉字退而南原人既是醉夫族孫其世系不須記而人知之矣配全義李氏其考進士瑩內外親稱其有婦德三子就甲進士甚有孝行鄉人累以薦聞於官次賢甲聖甲女壻尹後俊鄭履慶柳天椿也

三房皆有子而進士長子家志學修行可見尹氏之多賢也君生于 萬曆己亥没于 崇禎乙卯墓在所居木川之搜理洞子向之原醉夫葬于金浦新洞里今 上朝筵臣白復其墓戶云 崇禎重光作噩仲秋日恩津宋時烈述

宣教郎金君益炯墓表

慎獨齋金先生諱集適無育子彬與弟子精緻養服勤先生家事清寒而居處衣服飲食未嘗有缺志未嘗有違意未嘗不先顏未嘗不承凡百云爲未嘗有不可於先生者故先生甚安之而凡事其父母者無不取以爲法焉子彬名益炯光州人始自新羅王子

興光至今千有餘年而世爲甲乙族至子彬以文敬公爲父以文元公諱長生爲祖以黃岡先生大司憲諱繼輝爲曾祖以栗谷文成公李先生諱珥爲外翁其道學淵源聲光尊顯求之古今邈焉無儔惜乎以子彬世德家行闕於國俗不得爲世用也子彬平生不言人過不與人歡狎故人皆愛而重之年五十九纔沒先生喪仍遭母氏戚柴毀六年終不聽薑桂竟以壬寅六月十一日不起得年六十三墓在連山孤雲山先兆也娶司禦趙希軾女生子萬里今爲察訪二女適宋世傑金碩輔再娶曹守誠女生萬圭萬耄萬量萬堂察訪男鎮守鎮容鎮寬鎮憲鎮寧二女婿

李瑞林潤也萬圭子鎮遠女四人萬耄二女一子萬量二子萬堂一子二女內外孫曾總若干人余師事文元文敬二老先生與君有兄弟義略記始末於墓石如此云時 崇禎旃蒙赤奮若季春日友人恩津宋時烈述

贈義禁府都事朴君墓表

崇禎丙申月日光州生員朴善彬等幾人呈于本道監司曰本州人生員朴榮林幼有至行自十餘歲時已知承順親意劬書飭行未有子弟過年二十一而父得竒疾奉至醫家醫束手曰不可爲矣榮林晝夜號泣惟人事之窮則遂行禱于神其夜父夢有人

遺之以藥自是疾漸瘳人以爲感于神明人有奉養之具者爭相來助無所吝焉故其親便身之物莫不畢給焉以故在疾十餘年而泰然有安樂之意嗚呼榮林之孝之實若非積於中而著於外烏能孚信於物者若是哉方伯轉以上聞事下該曹該曹 啓贈義禁府都事君字伯顯順天人 本朝錫命 太宗朝封平陽府院君謚文肅高祖義孫縣監自是稍不振曾祖元壽祖彥琛考世挺累世不仕而俱有文行妣完山李氏其考光鍾也君孝行旣卓絕推以友愛于兄弟所與游皆恬靜清修之士鄰有賤人希得以善事親稱於鄉里與君氣類相感每來謁君君必延

入並坐所論皆孝德也斯所謂不匱錫類者歟配廣州李氏有婦德嘗承順君意忠養之物賴以無缺焉君年五十五而沒于 崇禎丙申李氏祔葬于州西時羅山卯向之原長子尚純進士以仁厚稱次尚厚君疾革割指進血次尚素次尚真生員文行俱優次尚規有至性不勝喪李曰尚準二女適金昌夏鄭守宗孫男光恒光謙光濟長房出光復二房出光潤光有四房出光潤文科及第光履光鼎五房出光晦光普季房出外孫金翼瑞斗瑞時瑞內外曾玄甚多余謂凡人不得罪於鄉黨州閭者鮮矣今光是南中大都會其人皆尚文有識而其合辭以聞於官者如此

則君之實行可知已光人始意有棹楔之典矣及退而不無以事偉報織爲慊者然君子性蕃衍而多賢亦有立揚於世者而女入河西金先生門奉其蘋蘩可謂盛矣君豈不能於人而能於天者歟觀此者庶幾無怠於爲善也歟時 崇禎闕逢因敦九月日

南陽府使朴公淳墓表

懦翁朴公宏才偉器早負公輔望然家有季淵則難爲兄也 孝廟初潛懦翁公甚見知及 卽位恨其不及用嘗於輪對 上目公久謂侍臣曰第幾人是朴某弟耶卽改其官蓋以眷懦翁者眷公也朝廷亦知 聖意所在議授以方面之任竟以下僚年五十

四卒于 崇禎丙申士友無不嗟惜而最相知如沂川洪公命夏市南俞公榮諸賢尤極其傷悼蓋不但爲私也公容貌嶷嶷然內行淳備以大家子文才豪逸人謂是於科第朝夕拾取然公常有湖海氣其於聲名祿位意有所不屑其就之也偶然去之也欻然其身信而不屈其志揚而不挫故達官要人亦多拱手以聽而官長使者不敢處以僚屬蓋其事行始卒大槩懦翁公規度而趣操則過之矣余故嘗曰知懦翁公則可知公知 孝廟之聖則可知二公之賢矣公沒後二十餘年公之孫泰初始治墓事文谷金相公銘其碣堂從子世采和叔誌其壙其所以發揮引

重者無餘蘊矣茲余略撮數語以對揚 孝廟則哲
之聖使今後之人知主聖臣賢者真非虛語也時
崇禎上章涖灘九月日恩津宋時烈述

處士朱君墓表

國朝以朱爲氏者起自全州始祖曰工曹典書仁今
其子孫多在北關之咸興君生長死葬皆在咸興諱
默字以容考通德郎胤男卒君七歲當室奉養祖母
韓氏母李氏年二十一始娶婦以成家業事親奉祭
咸盡其誠君高祖生員世鳳曾祖奉事虎臣其長子
大畜文科佐郎次子大臨生君之考而佐郎無嗣故
君移宗於己以主宗盟配寧海朴氏有婦德君年四

十四 崇禎丁亥卒朴氏誓不獨生水漿不入口雖
八子一女皆穉弱亦不顧也越四日甫成服竟自殞
正月二十五日也遠近聞者莫不哀之男長汝奎次
汝斗汝翼汝箕汝參汝井汝軫汝星汝翼汝參皆中
司馬女適朴泰素孫男昶旭晁焜昇昇餘幼余病伏
湖西之深谷汝奎徒步千餘里來問字余愧無以副
其遠來之意而嘉其醇質篤厚一日以君之銘爲請
余閱其家狀又知朴氏之節行如此真所謂楊公之
德又行於家者也銘曰
生還裔篤倫序於妻子考厥叙此足以觀銘何須多
語

忠義衛李公墓表

太宗大王別子曰孝寧大君補其曾孫灝明原君玄孫克成通政通政生諱卿雲登第由侍從官至寺正光海朝忤李爾瞻歸鄉里以沒 仁祖卽位贈職叅判叅判生諱光遠以孝行聞嘗親病斫指娶士人許燾女以 萬曆乙巳生公公諱益賢字士謙自幼能知事親禮晨昏定省出入必告朝夕滄隨不委婢使嘗手寫粟谷先生擊蒙要訣潛玩不已亦揭古聖賢格言于壁以自警省始爲公車業自丙丁亂後不復從事鑿池築室蒔花種竹以自娛沈公惕權石洲門人也甚有行義公相爲之畫沈公見公撫育孤惻審

於取予視財如膩歎曰人不可及也公歿于 崇禎壬子配黃氏先沒而葬于金浦郡西白石山東去公所葬馬山原十里而近黃氏淑質異凡有男子識量親戚稱其孝敬公奉先恤貧多賴其助常曰富然後爲所當爲則終無其日也籍昌原判尹璘之曾孫縣監湜之女三男萬春萬亨萬貞女適士人柳星瑞尹喜卿諸子皆有志行孫男鶴齡彭齡億齡柳生日章雲章尹生二女萬春萬亨與余游久矣故爲之書

進士李君墓表

此廣州一用里者故朝鮮進士李烜仲晦之藏也君才行出等夷不幸而不顯其名不大施於世顧其可

徵者有焉 上之四年戊午黨禍益急君孺人金氏女士也歎曰權臣益肆上天降災黎庶嗷嗷思慕羣賢矣顧仲子東亨曰汝於今可以言矣先是東亨諸友聚會論議謀所以伸辨者東亨兄弟懼有刑禍以爲慈母憂微言以謝客孺人聞之教曰毋以老身爲也余恐范滂母笑人也東亨等遂安其意與其弟東菴並離疏按至是東亨又獨詣政院投疏極言遂竄慶源慶距京師二千餘里親戚爭來唁慰孺人怡然不以爲意用事者微遣孺人族屬探孺人意蓋將以違拂母心加東亨罪也孺人曰今事是老婦所命也聞者皆歎服翌年己未十二月己丑沒於廣州村舍

時東菴亦從東亨於北塞孺人終無悲念二子語於是遠近相吊曰閻範亡矣因以講服君刑家之懿曰君八歲衰以哭母能感動閭里遭外服孺人語諸子乃父喪禮之盡至性然也夫居喪之禮鄉里稱之不足信也子弟親戚皆不若信於妻妾也嗚呼君其善矣哉其考沒時卑幼滿前考顧而歎各君而語曰汝在吾不恨死矣其信於父兄如此餘可以此而推也君嘗以藝成進士逮其永感則卜築於廣州光教山西麓扁以藏六曰存吾性保吾真以終吾年足矣年五十一而終於 崇禎丙申九月之己巳孺人十七歸于君君先公司議德言受贄訖問以世系孺人對

織悉無遺授戒語則拜跪以受其儀度整敏見者皆
賀焉蓋自幼時略通論語書女紅亦極精好蓋其資
質之絕異也如此諸子幼從牧豎遊孺人恨懊曰昔
孟母三遷而吾不能焉是吾過也卽遷居京第俾從
師友故諸子皆有文行於祭祀極嚴且慈承君意撫
李氏孤幼極其恩慈曰此無祿伶仃我若不恤無以
見先舅廟嗚呼賢矣哉古亦罕有也李氏出驪州始
自高麗校尉仁德其後臯翰林學士 本朝審寶文
閣提學近世有郡守鶴副尉承武判官錙判官生司
議公司議公以言行服人初事松江鄭公栗谷牛溪
二先生亦重愛之孺人籍順天考縣監日新左議政

承憲之後舉六子東一東明東道東亨東菴東郁東
明東道早沒東亨東菴皆進士東郁及第孫男膺庠
庠東一出康東明出庠序東亨出女適俞厚基尹淑
者東一東明出也諸子從卜人言別葬孺人於州西
之沙川將得吉而祔焉諸子余遊也故來請銘銘曰
黨錮羣正能扶漢鼎有婦人焉范母之賢其在今世
有孺人美所言皆義其德則懿二南之化不本王者
君子非之致之者誰嗟惟李君終古稱云

兵曹佐郎鄭公墓表

鄭公叔周子楨迎日人世居全州府倣儻有大志雖
達官要人心知其不善必唾而去之以故終身輒軻

而卒於 崇禎乙巳五月十四日葬于州西沃野縣之聯珠山二夫人李氏邊氏皆祔于後鄭爲東方大姓圃隱先生亦其宗也曾祖昌祿祖弘毅考贍妣李氏公以 萬曆丁未生焉光海朝讐 母議起公年甚少奮曰寧死爲毅鬼何忍聞此議遂從鳳谷金公東起學金公文元公老先生門人也 仁祖改玉就場屋游魁解額聲聞京師京師人皆遲其至二十九中司馬兩試丙子虜變倡率同志有捐軀死難之志又作檄文以責食祿而全身保妻子之人亂已慨念時事有大明天日赫臨頭之句除 陵寢郎有忌者誣謂由蹊逕得之公自署其考于壁曰豈附權門鼠

竊廩食考下下遂拂袖而歸 崇禎癸巳登文第先是府官連姻 王室橫恣無已有土豪媚承立石盛頌之公惡之與儕友遂字註其傍以刺之府官甚銜之至是其子弟削公槐院選降隸成均館嘗差典祀察戮盜竊犧牲者未幾賊臣許積因災異入告曰鄭叔周枉殺無辜足以感召也 天怒甚震同春宋公浚吉反覆申辨仍言公致敬祀享之誠事得已陞典籍歷司憲府監察禮曹佐郎移兵曹以事還仍禮郎爲保寧縣監又被修隙者所中而遞後連拜康津順天縣監濟州判官皆以年老遞公自少日與士友講論經史談說義理處家兄弟同居居官吏民畏愛解

緩歸時行橐如洗嘗於科製考官稱善有貴游子弟以計移於己有寃公者欲直公而歸之公悠然不許曰榮落命也夫科第人之大欲存焉於此一事可以見公之大略也男祥麟祥龍祥斗皆邊氏出伯仲同年進士仲嘗犯凶焰上疏謫去人謂極肖今爲繕工監奉事李業孫吳今爲營將三女壻姜翺周崔眈金會昌側出男祥發祥虞也孫男國賓碩賓長房出晉賓泰賓次房出勛賓華賓夏賓文賓季房出內外曾玄多不能盡錄公與余同年生雖居止遠不得朝暮遇而常慕公氣槩而每有黃鵠壤中之歎今諸胤猥有不朽之託而老病垂死略舉其槩如此云時 崇

積強圍單闕仲秋日德殷宋時烈述

義禁府都事金公墓表

惟我外兄金吾公姓金氏諱流字濟甫永同人世居報恩縣祖諱廉謹持家守身甚嚴且整成大谷先生運亟稱之考護軍諱好德妣恩津宋氏余姑母也公資稟甚美而姑母德義理致絕出尋常教公甚有法度公文行旣成於家庭又游文元公金先生之門且質疑於鄭文肅公經世其最親且久者蔡松川宗吉也公色夷氣清慈祥詳雅日必冠帶定省惟謹暇則危坐讀書雖放縱諧謔者必斂衽起敬爲不善者不畏朝評而畏公之聞之也事親承順溫柔養志無違

躬執滄澹不以爲勞常慕曾子之鋤瓜以親之嗜蹲
鴟也常手種以治親之所厚善者得美味必以分之
其伯兄沔非同胞也公事之盡其愛敬慈育其子女
同於己出公沒而其伯兄言及必涕出焉以小學教
其弟灝曰汝必以身允蹈毋徒誦說爲也李适反邑
宰以命將簡率勲舊家子弟勤王于行在公
故文平公守溫裔也令出而公先在蔡松川義旅中
矣邑宰以爲後至而將行軍法同在囚者皆號泣不
食公夷然曰命也人服其識量焉人有亡矢冊子而
或曰某可上者是也公頗遭困殫人若不堪而公但
悠然曰吾無是也後有人歸其冊子其人大慙或者

亦終身愧服每過公墓必下而瞻拜焉公嘗曰吾鄉
地僻民淳自具景輝爲寓公文采可觀而遜弟之風
則少衰矣崇禎丁丑遘疾未甚不廢觀省之禮
親視之則必冠巾應對以紓其憂惱其七月廿一日
竟不起春秋四十公年廿七捷司馬李忠定公貴掌
銓問士於座人以公對者甚多遂除金吾郎未幾遞
歸自是杜門不出配丹陽禹氏都事大有女男得源
得濂得洛二女爲縣監李碩堅士人朴思齊妻孫震
柱得源出震杖震櫟震樵得洛出噫吾姑母之賢難
爲子也而愛重公特異年將九十泣而思曰流之死
愈久而愈不能忘也余少從公遊服公之嘉言善行

深矣今顯之子得洙狀公行余爲表其墓曰公嘗自
號省谷公真可謂不負於斯云時 崇禎上章浚灘
月日內弟恩津宋時烈述

贈義禁府都事洪君墓表

南陽洪氏自高麗大師殷悅始爲東方大姓其後一
派落南爲全湖右族有昭威將軍允熙自康津移淳
昌其子諱澗又移光州生諱敬升官奉事以豪放不
羈名於世生承議郎諱艇娶僉知中樞府事李玉剛
孫女 萬曆庚戌生君君諱以濟字成甫生四歲能
識字九歲李氏沒素食三年長者勸之肉則輒涕泣
不聽弱冠游黌序儕流莫望焉金承旨光赫宰南州

見公詩大加稱賞己而承議公患風病神昏口瘖飲
食動息有同襁褓小孩樣時君年踰四十素且清羸
其左右扶持晨夜抱持辛勤勞苦千緒萬端而君誠
意彌篤凡有所欲必先意承奉以故君在傍則輒收
嗔怒欣然和順焉嘗於夜間以所持竹片誤觸君阿
堵睛出垂下君左手收納輪眶右手執事如常不使
知也其繼母常曰夫子之疾誠所憫迫而吾所慙念
常在於此子之傷死也如是七年未嘗一入私室及
喪毀至危身服闋常杜門謝外事君恒追慕嘗夢承
議公來臨歡迎陪晤極其雍容承議公歔歔悲歎涕
下漣漣仍語地下事甚詳君悅然而起詳錄顛末而

仍忽忽不樂於在世惟願下從竟以丁未四月終焉
春秋五十八夫父子精氣無間幽明而常人例爲物
欲所蔽昏然罔覺惟君誠心專一故其感通貫徹告
語叮嚀帝舜所謂夙夜惟寅直哉惟清者豈不信然
乎君之孝誠益可徵於斯也配順天朴氏忠義衛彥
臧之女後公八年沒而祔葬墓在南平於田里負辰
之原先兆也子禹紀才而早死有男汝千次禹徵禹
明二房男女皆幼三女壻高可遠李初存朴致久高
卽霽峰玄孫也鄉之士夫屢舉君羣行聞于官今領
相文谷金公壽恒以宗伯覆啓蒙 允而該曹只贈
六品職同春宋公浚吉嘗慕公行甚恨所贈之不稱

也君善事繼母推其餘篤於兄弟友朋亦可爲衰世
之勸云時 崇禎甲子九月日恩津宋時烈述

咸陽郡守趙公墓表

國之南郊柁陽之牛浦里白川趙氏世居之有南溪
公諱廷虎爲 仁祖朝名臣與弟縣監諱廷鸞行義
篤厚南溪公有子曰錫胤文章道義爲一時所推世
所謂樂靜者也公縣監公之長子諱錫祿字享之學
於南溪公父子又間嘗出入慎齋金先生門公稟質
寬厚容貌休休樂靜公常期以遠到公樂善好義尤
篤於事親縣監公嗜酒公以婦家財常不缺樽爵疾
病侍湯劑候氣息一刻不離傍側夜則假寐戶外而

亦不使親知之疾革則割指進血既又喪盡其哀祭極其嚴而孝德備矣與二弟錫命懷之及錫齡友愛甚至季弟嘗得心恙生理冷薄公經紀其舍業尤悉心力叔父之喪冒染癘手自襲歛終於無恙庾袞之行無以過也爲宗家祭祀買置田民以爲永久計公之行義舉其大槩則如是矣公嘗治公車業捷祭酉進士居上游乙亥其姨兄進士宋時瑩倡率多士請以栗谷牛溪兩先生從祀文廟公出氣力以折羣不逞之異論者自丙丁亂後無意進取遯跡南土力田爲養縣監公夢寐鄉閭又不堪塘草之思公奉歸衿陽無非所以悅適親心也眷集旣復團聚南溪公白

首湛樂卒歲以嬉摺紳無不歆艷焉 仁祖戊子公年三十八筮仕爲 陵寢郎憂吉復職爲禁府都事平陞直長主簿再入禁府爲經歷歷刑曹佐郎移工曹以稷山縣監丁外艱喪除爲戶曹佐郎掌隸院司議爲龍仁縣令未幾由漢城庶尹爲咸陽郡守以事就吏徒配安山蒙宥爲歸厚別提令 上甲寅時事大變遂屏跡郊居未嘗入城市庚申更化叙爲平市令翌年辛酉年七十一而卒其十一月二十七日也公居官不擇內外皆以約己奉公損上益下爲本土友聞公卒莫不嗟惜恨其用之不稱其人上世有諱文胃兵部尚書上將軍自是冠冕赫世 本朝辟

太祖朝翊戴功臣嘗奉使皇朝 高皇帝召見奏言
臣曾見陛下於脫脫軍中 高皇帝嘉賜獎語公其
八代孫也高祖長孫副司果 贈左通禮曾祖應斗
副護軍 贈左承旨祖諱冲副護軍縣監公以公從
勲 贈左承旨妣晉州鄭氏從 贈淑夫人鄭氏軍
資正谷之女己卯人思顯之孫甚有家法婦德咸備
公娶禮賓正鄭光前女一男曰愷生員三女壻生員
韓聖佐進士李鼎蕃生員尹孝教愷三男光璧潤璧
生員弘璧生員配休配愈皆韓出李尹皆無育余叔
父習靜公諱邦祚實與南溪公爲姓不同兄弟而縣
監公又友壻也余因緣出入誼情篤厚熟知公賢遠

於人與爲通家契歲己酉習靜公沒葬于清州地公
自咸陽馳至相與哭於柩前因道語故舊宜宜而痛
惜樂靜公尤甚也今懷之託余以公銘嗚呼吾雖老
廢筆研然顧何忍辭遂序次如右而繼之以銘曰
嗟惟公賢世孰如之晦不自銜人莫能知漢水之南
有田有泉密邇天邑蹄轂紛然不視不趨我飲我食
修其孝弟惟行是飭斃出而仕俄倦而歸惟此一丘
永闕餘徽銘而無愧吾今庶幾

生員任君墓表

浦渚先生文孝趙公諱翼開門授徒其教以孝悌爲
本諸生隨其賢愚皆務於實行有任君暎字光甫在

諸生中尤純篤趙公見其色愉而貌婉知其深於愛
亟稱而愛重焉君文藝早成場屋屢居上游年四十
一始成 崇禎壬午生員前數年連喪考妣哀毀成
疾遂以其八月初五日沒君豐川人高麗御史澍其
鼻祖也 本朝諱鼎臣官觀察使諱琦壬辰之亂舉
義討賊官縣監諱羲之官司藝君之曾祖祖及考也
妣原州元氏郡守景謹女君既免喪餘哀發於聲小
兒問何以哭君書一句曰兒童問我悲何事此意他
年汝自知嗚呼喪失其哀久矣若君者可謂性於孝
而不負師門之教者歟疾既劇妻與幼子皆割肌進
血又露禱乞以身代君亦可謂錫類焉爾葬于牙山

竹谷里媿申氏監役邦憲之女夷簡公瑛之玄孫既
歸君元夫人每稱曰吾家孝婦君沒過哀翌年癸未
年三十九沒而祔焉男長弘挺卽幼而割肌者弘益
弘望皆登第士類推許焉女適金振洙孫啓敞敬歎
長房出周尚向高仲房出季房出者浩洞也噫君之
生若將有爲而早沒不顯然能以天畀有於己而化
於家其視貴而老壽而蠢然者何如也諸子能自樹
立而所抱蕃衍或者天之報施其在斯歟

九菴先生文集卷一百四十二

